

閩

詩

錄

閩詩錄丙集卷二

侯官鄭杰原輯

侯官陳衍補訂

謝伯初

伯初字景山晉江人天聖二年進士官許州
法曹

寄歐陽永叔謫夷陵

江流作險似瞿塘滿峽猿聲斷旅腸萬里可堪人謫
宦經年應合鬢成霜長官衫色江波綠學士文章蜀
錦張異域化爲儒雅俗遠民爭識校讐郎才如夢得

多爲累情似安仁久悼亡下國難留金馬客新詩傳
與竹枝娘典辭懸待修青史諫草當來集阜囊莫謂
明時暫遷謫便將纓足濯滄浪

許昌公字書懷呈歐陽永叔韓子華王介甫

十年趨競浪求營因得閒曹減宦情亂種黃花看野
景旋移高竹聽秋聲馳驅賤事猶干祿約勒清狂爲
近名早晚持竿釣鱸鰥雙溪煙雨一舟橫

宋文鑑

六一詩話云天聖景祐間景山以詩知名余
謫夷陵景山方爲許州法曹以長韻見寄頗
多佳句有長官衫色云云余答句云參軍春
思亂如雲白髮題詩愁送春蓋景山詩有多
情未老已白髮野思到春如亂雲之句故余
以此戲之也景山詩頗多如自種黃花添野

景云云園林換葉梅初熟池館無人燕學飛
之類皆無愧于唐諸賢而仕宦不偶終以困
窮而卒

句補

移家尙恐青山淺隱几惟知白日長

劉諷都官致仕古今詩話

黃孝先

補

孝先字子思浦城人天聖二年進士爲宿州
司理以薦遷大理寺丞知咸陽縣終太常博
士

余嘗守官咸陽縣廨之後臨渭河汀嶼中連歲
皆有孤雁來棲於葭葦中今歲冬深不復至

矣或已在矰弋或去而之他皆不可知也感

而爲詩題亭壁

天寒霜落雁來棲歲晚川空雁不歸江海一身多少

事清風明月我露衣

侯鮚錄

弔宿州妓張溫卿

人生第一莫多情眼看仙花結不成爲報兩京才子
道好將詩句弔溫卿

句

恩同花上露留得不多時

能改齋漫錄云宿州妓張玉姐字溫卿色藝冠時沈子山爲獄掾最所鍾愛罷官途次南

京念之不忘爲賦別銀燈云一夜隋河風勁
霜混水天如鏡古柳長堤寒煙不起波上月
無流影那堪嬾聽疏星外離鴻相應須信道
情多足病酒未到愁腸還醒數盞卮餘香
未減甚時枕鴛重並教伊須更將盟誓後言
約定其後明道中張子野黃子思相繼爲掾
尤賞之偶陳師之求古以光祿卿來掌榷酤
溫卿遂托其家僅二年而亡才十九歲子思
以詩弔之云云先是子思有愛姪宜哥客死
舟中遺言葬堤下冀他日過此得一見以慰
孤魂子思從之作詩納棺中其斷章云云二
人皆葬宿州之東

日者未知裴令貴世人爭笑禰生狂詠
六子露井榴開三四花春明退懷風簾燕引五

呂造

補

造晉江人言子天聖二年進士

刺桐城

閩海雲霞繞刺桐
往年城郭爲誰封
鷓鴣啼困悲前事
荳蔻香銷滅舊容

宋

咸補

泉州雜記云泉州築城時環城皆植刺桐故
號刺桐城呂造詩云

咸字貫之建陽人天聖二年進士累官知邵武軍移守韶州轉職方員外郎晉都官郎中嘉祐十一年爲轉運使著有易訓等書

陽朔山

獨起獨高雄入漢相輝相映翠成堆若非羣玉嵐西

至卽是三峰海上來
疑有洞天通日月
絕無樵路到塵埃
如何得似巨靈手
擘向天家對鳳臺

宋詩拾遺

張沃補

沃閩縣人天聖二年進士官饒州都曹

蟄龍潭

蟄龍潭裏蟄潭上風波急一日飛上天魚蝦不相及

全閩詩話

云蟄龍潭上有洲形如半月名半月洲宋進士張肩孟居此其子勔六歲誦唐

詩誰把玉環分兩片半將江水半浮空之句以形容其勝又有張沃者七歲不能言一日過此潭開口詠云云

詹先野補

先野字景舒崇安人經史百家歷覽無遺天
聖四年領鄉薦繼應賢良科後竟不仕隱武
夷

廩江

武夷山志

武夷溪九曲曲曲可垂釣自得溪山樂何須公與侯

張式

式字景則仙遊人天聖五年進士官太常博士
歷知濠壽二州

九鯉湖

半生漂落江湖外此日登樓花正開丹竈依然沈淵
水珠簾空自挂瑤臺昔年道士何時去前度遊人今
又來點檢洞門題咏處幾多墨迹篆蒼苔

阮逸補

逸字天隱建陽人安定先生胡瑗之門人天
聖五年進士爲鎮江軍節度推官皇祐中與
瑗同典樂事遷尙書屯田員外郎

隱居詩話云至和中阮逸爲王宮記室王能
詩與逸唱和有句曰易立太山石難枯上林
柳有言其事者朝廷方治之會逸坐他事因
廢棄

題竹閣 在嚴州能仁寺之南

僧閣倚寒竹幽襟聊一開清風曾未足明月可重來
曉意煙垂草秋姿露滴苔佳賓何以許雲瑟與霞杯

嚴州府志

吳育補

育字春卿建安人天聖五年進士累官樞密副使參知政事尋以資政殿大學士尚書左丞知河中府徙河南卒贈吏部尚書謚正肅有集

題峴山石幢

羊公千載得清吟芳迹雖遙契昔心更與峴山爲故

事凜然風格照來今

襄陽府志

趙誠

補

誠字希平

一作希中

晉江人天聖五年登進士第

歷官撫州通判改知歸州州有淫祠曰巴王

歲夕殺人以祭誠毀祠投像于江入爲三司

戶部判官治平中以太常少卿知明州卒于

官

遊雲門寺

竟夕雨聲寒黎明日氣宣峰巒添積潤谿澗漲新痕
鐘鼓連三寺杉松共一村不須遊賞遍麗句滿清軒

遊天衣寺

世稱幽景屬金仙若是精藍豈妄傳澗湧雙泉雷出
地山圍四面管窺天唐僧手澤神毫健梁帝宸恩寶
器妍今日喜償平昔志更逢閩客此安禪

遊戒珠寺

欲遊城郭應難遍每訪湖山亦自勞坐致眼前無限
景僧坊寄處戴峰高以上會稽
掇英集

蔡 襄

襄字君謨莆田人天聖八年進士厯官龍圖
閣大學士知開封府以樞密直學士出知泉州

州福州召爲翰林學士權三司使拜端明殿學士知杭州卒贈吏部侍郎謚忠惠有莆陽居士集

歐陽永叔云君謨文章清邁粹美王梅溪云文以氣爲主公之詩文實出于氣之剛入則爲謇諤之臣出則爲神明之政無非是氣之所寓案苕溪漁隱叢話云余觀東坡荔枝歎注謂大龍茶始于晉公而成于蔡君謨歐陽永叔聞君謨進小龍團歎曰君謨士人也何至作此事今年閩中監司乞進鬱茶許之故其詩云武夷溪邊粟粒芽前丁後蔡相籠加爭新買龍各出意今年鬱品充官茶閩中錄云君謨先固始人入閩寓仙遊遷莆田因家焉十八登進士五十六歲而卒書爲當時四大家之一文情粹美乾道賜謚忠惠堅匏集云仁宗朝爲學士出守泉州造洛陽

橋以洞賓筆口爲檄使隸之海若而告之
款曰茫茫遠水何所投檄買酒酣飲醉臥海
岸潮落而醒則檄已易封矣襄啟閑之惟一
期潮水果三日夜不進其日正犯九良星襄
策馬當之曰君是九良星我是蔡端明相逢
不下馬口口口口前程遂與作無忌橋成時人
以詩頌之曰疊石爲橋與路通惠安之北晉
江東幾時募化千元寶一旦緣成萬載功五
尺欄杆遮巨浪兩頭華表鎮危峰往來多少
行人口口月齊休頌蔡公
泊宅編云朝奉郎李遘知興化軍時蔡君謨
白福帥尋罷歸鄉病革以後事屬李守守夜
夢神人紫綬金章從數百鬼物升廳與守云
王蔡襄當代者守問何神代者復何人神曰予閻羅
王蔡襄當代我明日蔡公薨李作挽詞有不
向人間爲冢宰卻歸地下作閻王之句蓋寔
錄也

蒲陽文獻誌云公以母老乞知福州改福建
路轉運使奏減五代時丁口稅之半復入修

起居注救唐介呂景初吳中復馬遵仁宗親書君謨二字賜之遷龍圖閣知開封府再知福州郡士周希孟陳烈陳襄鄭穆以行義著襄備禮招延誨諸生以經學徙知泉州距州二十里萬安渡絕海而濟往來畏其險襄立石爲梁其長三百六十丈種礪於礪以爲固蘭陔詩話云忠惠故宅在莆田城南王梅有過蔡宅詩云丹荔株株經品藻喬松夜溪惠清涼今其子孫尙居焉案忠惠與京本非一族宋史本傳云蔡宗與同郡而晚出欲附其名閥自稱爲族弟文文山亦云莆中有二蔡類江鮑詩兼王孟文宗韓昌黎奏疏似公書法駕蘇黃米三家之上又精畫理謚不曰文而曰惠豈爲政事所掩耶

鄼陽行

春秋書大水災患古所評去年積行潦田畝魚蛙生

今歲穀翔貴鼎飪無以烹繼亦掇原野草萊不得萌
剝伐及桑棗折發連簷甍誰家有倉囷指此爲兼并
頭會復箕歛勸卒以爲名壯強先轉徙羸瘠何經營
天子憂元元四郊揚使旌朝暮給餧粥軍稟闢豐盈
殍亡與疫死顛倒投官坑坑滿棄道旁腐肉犬豕爭
往往互食噉欲語心魂驚荒村但寂寥晚日多哭聲
哭哀聲不續飢病焉能哭止哭復吞聲清血暗雙目
隴上麥欲黃繼命在一熟麥熟有幾何人稀麥應足
縱得新麥嘗悲哉舊親屬我歌鄭陽行詩成寃忍讀

四賢一不肖詩

中朝鸞鵠何儀儀慷慨大體能者誰之人起家用儒
業馳騁古今無所遺當年得從諫官列天庭一露胸
中奇失身受責甘如薺沃然華實相歲蕤漢文不見
賈生久詔書曉落東南涯歸來俯首文石陛升以京
兆天子毗名都翼翼郡國首里區百萬多占辭豪宗
貴幸矜意氣半言主上承其顧昂昂孤立中不倚傳
經決訟無牽羈老姦黠吏棘其手衆口和附歌且怡
日暮黃幄邇天問帝前大畫當今宜文陳疏舉時密
啟此語多秘世莫知傳者籍籍十得一一者已足爲
良醫一麾出守蕃君國惜此智慮無所施吾君睿明

廣視聽四招俊乂隆邦基廷臣諫列復籍口安得長
喙號丹墀晝歌舞夕寢心如疚咄哉汝憂非汝爲

右范仲淹

南方之強君子居卓然安道襟韵孤詞科判等屢得
雋呀然鼓焰天地爐三年待詔處京邑斗粟不足榮
妻孥耳聞心慮朝家事螭頭比奏帝曰都校書計課
當序進麗賦集仙來顯途誥墨未乾尋已奪不奪不
爲君子儒前日希文坐言事手題勅教東南趨希文
鯁亮素少與失勢誰復能相扶嶄然安道生頭角氣
虹萬丈橫天衢臣靖胸中有至語舉盃不避蕭斧誅
使臣仲淹在廷列日獻陛下之嘉謨刺史榮官雖重

任奈何一郡卷不舒言非由位固當罪隨曹扁舟盡室俱炎歟此去數千里橐中狼籍惟蠹書高冠長佩叢闕下千百其羣訶爾愚吾知萬世更萬世凜凜英

風激懦夫

右余靖

君子道合久以成小人利合久以傾世道下衰交以利遂使周雅稱嚶鳴煌煌大都足軒冕綽有風采爲名卿高名重位蓋當世退朝歸舍賓已盈脣肩諂笑不知病指天報遇如要盟一朝勢奪德未改萬鈞已與毫釐輕畏威訛上亦隨毀矧復鼓舌加其誣逶迤陰拱氣質厚兩耳塞豆心無營嗚呼古人不可見今

人可見誰與明章章節義尹師魯飭躬佩道爲華榮

希文被寵激人怒君獨欣慕如平生抗書轂下自論
効惟善與惡宜彙征削官竄逐惟適楚一語不挂離

騷經當年亦有大臣逐朋邪隱縮無主名希文若果

事姦險何此吉士同其聲高堂本欲悟人主豈獨區

區交友情右尹

先民至論推天常補袞扶世爲儒方圓冠博帶不知

本榜櫟安可施青黃帝圖日盛人世出今吾永叔誠

有望虛心學古貴適用異端莫得窺其牆子年五月

范京兆服天子命臨鄱陽二賢拜疏贖其寵勢若止

沸反揚湯勅令百執無越位諫垣何以敢封囊哀求
激憤亦復奮強食不得下喉吭位卑無路自聞道日
視雲闕高蒼茫裁書數幅責司諫落筆驥驥騰康莊
刃迎縷析解統要其間大意可得詳書曰希文有本
末學古通今氣果剛始從理官來秘閣不五六歲爲
天章上心倚若左右手日備顧問鄰清光苟爾希文
實邪佞曷不開口賦否臧陰觀被譴始醜詆摧枯拉
朽奚爲強倘曰希文實賢士因言被責庸何傷漢殺
王章與長倩當時豈曰誅賢良惟時諫官亦結舌不
曰可諫曰罪當遂令百世覽前史往往心憤涕泗滂

斯言感切固已重讀者不得令激昂肯圖反我爲怨
府袖書乞憐天子旁謫官一邑固分耳恨不剖腹呈
琳琅我嗟時輩識君淺但推藻翰高文場斯人滿腹
有儒術使之得地能弛張皇家太平幾百歲正當鑑

古修紀綱賢才進用忠言錄祖述聖德垂無疆右歐陽修

人稟天地中和生氣之正者爲誠明誠明所鍾皆賢
傑從容中道無欹傾嘉言讜論范京兆激姦糾繆揚
王庭積羽沈舟毀銷骨正人無徒姦者朋主知膠固
未遐棄兩轔五馬猶專城歐陽秘閣官職卑欲雪忠
貞無路歧累幅長書抉幽憤一責司諫心無疑人謂

高君如捷市出見搢紳無面皮高君搆書奏天子游
言容色仍怡怡反謂希文謀疎濶投彼南方誠爲宜
永叔忤意竄西蜀不免一中讒巧辭汲黯嘗糾公孫
詐弘于上前多謝之上待公孫禮益厚當時史館猶
刺譏司諫不能自引咎復將已過揚當時四公稱賢
爾不肖讒言易入天難欺朝家若有觀風使此語請
與風人詩右高若訥

澠水燕談云景祐中范文正公知開封左右
言公朋黨黜知饒州余靖安道論救坐貶尹
師魯洙言臣與仲淹義兼師友當從坐貶監
郢州稅歐陽永叔移書責司諫高若訥若訥
怒繳其書降授夷陵縣蔡君謨作四賢一不
肖詩四賢謂希文安道師魯永叔不肖謂若

詩也布在都下人爭傳寫鬻書者市之頗獲
厚利

上元應制

高列千峰寶炬森端門方喜翠華臨宸遊不爲三元
夜樂事還同萬衆心天上清光留此夕人間和氣閣
春陰要知盡慶華封祝四十餘年惠愛深

謝賜御書詩

皇華使者臨清晨手開寶軸香煤新沿一作法名與字
發深旨宸毫洒落奎鈞文精神高遠照日月勢力雄
健生風雲混然氣質不可寫乃知學到非天真藏
自語價希代誰顧四壁歎空貧臣聞帝舜優聖域臯

陶大禹爲其鄰吁俞勅戒成典要垂覆後世如空旻
陛下仁明如舜禹豪英進用司鴻鈞臣襄材智最驚
下豈有志業通經綸獨是丹誠抱忠樸常欲贊奏上
古珍又聞孔子春秋法片言褒貶賢愚分孝經內省
不自稱但思至理書諸紳乾坤大施入洪化將圖報
效無緣因誓心願竭謨謀義庶裨萬一唐虞君

閻書云蔡君謨謝賜御書云臣襄伏蒙陛下
特遣中使賜臣御書一軸其文曰御筆賜字
君謨者臣孤賤遠人無大材藝陛下親洒宸
翰推著經義俾臣夙誦以盡謨謀之道事高
前古恩出非常臣感懼以還謹撰古詩一首
以教遭遇干冒聖慈臣無任荷戴兢榮之至
朝奉郎起居舍人知制誥權同判吏部流內
銓上騎都尉賜紫金魚袋臣蔡襄上進

遊鼓山靈源洞

郡樓瞻東方嵐光瑩人目乘舟逐早潮十里登南麓
雲深翳前路樹暗迷幽谷朝雞亂木魚晏日明金屋
靈泉注石竇清吹出篁竹飛毫劃削壁勢力忽驚觸
罈蘿躋上峰太空延眺矚孤青浮海山長自挂天瀑
况逢肥遯人性尙自幽獨西景復向城淹留未云足

楊叔武北堂夜話

歲晏物景薄層陰向晚饒輕雲隱秋月殘雪棲枯條
夫君有高適顧我慰寂寥瀟洒開北門拂榻延良宵
前几陳古書坐見千載遙間亦發新句幽思含九韶

神明靜外照念慮醉中消楊雄戒丹轂顏子安一瓢

良玉不火變翠柏甯霜凋此心固獨往聲利詎得招

爐灰寒更劃燈焰落仍挑相看數漏板後會誠重要

宋比玉云蔡公詩律七言宗李杜五言出入王孟如爐灰寒更盡燈焰落仍挑寫北堂夜話之景真畫手也與唐人凍瓶粘柱澣宿火

焰爐灰語可頽頽矣若五言古之姑胥行櫛陽行有晉魏六朝遺致非唐之藻近者可及

訪天台巖

幽人去未還門戶和雲閉亭午樹陰圓深冬泉響細

嘉禾郡偶書

盡道瑤池瓊樹新仙源尋到不逢人陳王也作驚鴻

賦未必當時見洛神

十三日出趙園看花

水際開花千萬窠初鶯時逐麗人歌欲知太守行春樂只向東城得最多

題將軍巖

赤日正亭午解衣巖石下石泉殊甘涼野籟亦瀟洒驚猿度嶺雲還果墜庭瓦披軒忽永歎幽抱不可寫

西郊

曉蓋西郊道春光極太虛村風香晚稻溪日曝寒魚雀噪飢鷹下山空病木疎歸期侵杪歲東望是吾廬

夜雨病中

久雨曾無度
陽和漸向闌
雜香生衆木
濃翠入孤巒
漏緩宵仍靜
燈微曉更寒芳
時猶卧病何
日出城看畫寢
宴坐軒憶與蘇
才翁會別

投涼下馬卧僧家
遶簾清風卷絳紗
修竹滿前微雨過
遠山無際薄雲遮
武侯舊隱人應到
粵國孤城日自斜
解與塵心消百慮
更開新焙煮靈芽

花有所感悼

愛花盡日傍花臺
點檢當年手自栽
前事已隨朝暮

變舊叢空見淺深開山禽忽下還飛去溪雨纔收又
復來只有春醪能遣悶無人欄畔共持杯

宿漁梁驛

庭樹疎疏河漢低瓦溝霜白月平西寒鴉不奈單栖
苦落泊驚飛到曉啼

十二日晚

欲尋軒檻倒清樽江上煙雲向晚昏須倩東風吹散
雨明朝卻待入花園

案古香齋藏帖跋云此詩洪氏收入唐人絕句實君謨詩也

入天竺山留客

山光物態弄春暉
莫爲輕陰便擬歸
縱使晴明無雨過
入林深處亦霑衣

稼村詩帖

布穀聲中雨滿籬
催耕不獨野人知
荷鋤莫道春耘早
正是披蓑叱犢時

夢中作

補

天際烏雲含雨重
樓前紅日照山明
嵩陽居士今何在
青眼看人萬里情

宋比玉古香齋藏帖跋云此蔡君謨夢中詩也真迹在濟明家筆力遒勁元祐五年二月四日蘇軾題後

錢塘題壁案

蔡忠惠公集作書小閣壁上

綽約新嬌生眼底侵尋舊事上眉尖問君別後愁多
少得似春潮夜夜添

案古香齋藏帖跋云錢塘有美堂前小閣中
壁上小書此詩蔡君謨真迹也陳述古摹刻

軾在定香橋野店中觀之
案蘇詩常潤道中有懷錢塘寄述古云去年
柳絮飛時節記得金龍放雪衣翁方綱注云

予得東坡墨蹟云天際云云此蔡君謨夢中
詩也僕在錢塘一日謁陳述古邀余飲堂前

小閣中壁上小書一絕君謨真迹也綽約云
云又有人和云云不知誰作也杭州營籍周

詔多蓄奇茗常與君謨鬪勝之詔又知作詩
子容過杭述古飲之部泣求落籍子容曰可

作一絕詔援筆立成日隴上巢空歲月驚忍
般若經詔時有服衣白一坐嗟嘆遂落籍同
看回首自梳劍開籠若放雪衣女長念觀音

輩皆有詩送之胡楚云云龍韻云云按公詩
自注杭人以放鵠爲太守壽此不欲明言所
指而託之放鵠文字之狡猾也馮應榴云翁
氏所得帖見卞氏書畫彙考所引周部落籍
事見侯鯖錄

秋日登郡樓

落葉隨飛鳥疎砧答暮蟬悠悠戍樓角悽切萬家傳

寒食遊西湖

知福州作補

山前雨氣曉才收水際風光翠欲流盡處旌旗停曲
岸滿潭鉦鼓競飛舟浮來煙靄疑相就引去沙禽好
自由歸騎不令歌吹歇萬枝燈燭度花樓淳熙三山志

句

時平生戰地農情入春田

王禹玉云君謨咏草詩有云云之句其言關教化非野火燒不盡春風吹又生之比

草際飛螢乍有無

劉后村云蔡公清暑堂詩云云詩家要渺之音也有王右丞蘇州之風

劉

异補

异字成季閩縣人天聖八年進士以文學知名累官將仕郎大理評事終屯田員外郎

遊靈巖

藥水標題不記年奇花深洞舊通僊山迴巨蔭常遮日境絕纖埃別是天碧照東西江浩渺緣迷高下竹

娟娟凭欄周覽翛然靜金像香殘一炷煙

漢南府志

熊知至

補

知至字意誠建陽人天聖中五舉不第歸隱
鰲峯有集

贈王山人

閑拄瘦筇枝衣冠半異時入城人不識賣藥俗長疑
飲酒難逢醉餐松自止飢華峰千嶂裏常與白雲期

翰墨大全

句

樓臺上下火照火車馬往來人看人

觀燈統譜

萬

黃亢

補

亢字清臣浦城人有東溪集

宋史新編云年十五以文謁翰林學士章得象得象奇之遊錢唐以詩贈處士林逋逋尤激賞時王隨知杭州奏禁西湖爲放生池亢作詩數百言士人爭傳之

臨水

人生朝復暮水波流不駐去年昨日水今日到何處
惆悵雨殘花嫣紅隨水去花落水東流識盡人生趣

荆溪林下偶談云文鑑載亢臨水詩云去年
昨日水今日到何處蓋蹈襲杜牧題安州浮雲
樓寄湖州張郎中云當時樓下水今日到
何處

蔡高

高字君山莆田人襄弟景祐元年進士授長

溪尉遇太康主簿

蘭陔詩評云君山卒時年甫二十八兄君謨
發其遺稿得數十萬言皆當時之務妻程氏
能卻太康人之譖亦賢婦也

謁館閣校勘歐陽公

此日登史閣高風孰可追學期明主佐道許後生師
余豈能自信公真不我欺微躬托所厚慚愧異新知

柳永

永字耆卿初名三變崇安人景祐元年進士
爲屯田員外郎以樂章擅名有兄三復三接

皆工文號柳氏三絕

閩書云柳永工詞章仁宗誕辰太史奏老人星見永爲醉蓬萊詞以獻詰不稱旨曰此人不宜仕宦且去填詞因自稱奉旨填詞柳三變歐陽凱奏之日錦爲耆卿腸花爲耆卿骨名章雋句笙簧間發王元澤追慕永才亦有賴有樂章傳樂府落落驪珠照古今之詠獨醒雜志云柳耆卿風流俊邁聞于一時既死葬于棗陽縣花山遠近之人每遇清明日多載酒肴飲于耆卿墓側謂之弔柳會方輿勝覽云范蜀公嘗曰仁宗四十二年太平鎮在翰苑十餘載不能出一諸歌咏乃于耆卿見之仁宗嘗曰此人任從月下風前淺斟低唱豈可令仕宦遂流落不偶卒于襄陽死之日家無餘財羣妓合金葬之于南門外每春月上塚謂之弔柳七

故侯幽隱直城東草樹扶疎一畝宮曾珥貂璫爲近侍卻餘條褐作閒翁高吟擁鼻詩懷壯雅論盱衡道氣充厭盡繁華天上樂始將蹤迹學冥鴻

青箱雜記云仁宗朝內臣孫可久賦性恬淡年逾五十卽乞致仕都下有居第堂北有小園城南有別墅每良辰美景以小車載酒優遊自適百曼卿嘗過其居題詩屯田員外郎柳永亦贈詩云云

中峰寺

攀蘿躡石落崔嵬千萬峰中梵室開僧向半空爲世界眼看平地起風雷猿偷曉果升松去竹逼清流入檻來旬月經遊殊不厭欲歸回首更遲迴

建甯府志

鬻海歌 爲曉峰鹽場官作

鬻海歌憫亭戶也

鬻海之民何所營婦無蠶織夫無耕衣食之源太寥落牢盆鬻就汝輸征年年春夏潮盈浦潮退刮泥成島興風乾日曝鹹味加始灌潮波增成滷濃鹹淡未得閑採樵深入無窮山豹蹤虎迹不敢避朝陽出去夕陽還船載肩擎未遑歇投入巨灶炎炎熱晨燒暮熒堆積高才得波瀉變成雪自從瀦滷至飛霜無非假貸充餓糧秤入官中得微直一縉往往十縉償周而復始無休息官租未了私租逼驅妻逐子課工

程雖作人形俱菜色鬻海之民何苦辛安得母富子

不貧本朝一物不失所願廣皇仁到海濱甲兵淨洗

征輸輒君有餘財罷鹽鐵太平相業爾惟鹽化作夏

商周時節

案見大德昌國州志

句

分得天一角織成山四圍

題會景亭

會稽志

鄭伯玉

伯玉字寶臣莆田人景祐元年進士授秘書

省校書郎官至殿中侍御史有錦囊集

鄭山齋云公以韓魏公薦爲御史爲人峭直不避權貴好爲詩所作三百餘首時人以與

陳著琪方提舉孝清詩彙爲一集號烏山
三賢詩

和王太傅遊國清塘

莆陽文獻

寒日一觀眺四天雲色希水風迎棹起沙鷺背人飛
玉縷鱸新膾金膏蟹正肥斜陽促歸旆那得戀魚磯

綠野亭

二月池邊景色好天與人意相怡融鶯毛絮輕颺晴
日鴨頭波暖搖青空幽鳥間關變新哢高花亂旋飛
斜紅樽前忽爾感時節酌酒醉倒酬東風

雨過黃梅夏將半園亭清酒如山家白鳥窺魚立閒
暇紅蜓弄水飛交加垣衣重重長舊暉萱草節節含

新花蘂葉簟涼一就枕起來日抱西山斜

吾愛高秋亭上望水風涼澹愜幽情山形左右互拱
揖海氣且暮多陰晴西疇農歌罷亞熟北埭漁唱滄
浪清人生得酒且自適何必身後立空名

路出煙村俗駕少江天落莫憎寒威依依壺嶠草樹
變藹藹海門煙火微日脚下時一雁度風頭起處雙
鴉歸卻擁殘爐撥灰坐冷煖世途空險巇

和夏日國清塘泛舟

三篙搖漾綵帆輕勝賞甯辭遠郡城水滿人如天上
坐波澄舟在鏡中行都無暑氣侵衣袖時有荷香入

酒觥野老岸前爭擁看知公威震不喧驚

宿僧寺

亭宇無塵落葉天西風一榻稱高眠夜深更愛松間月被碎清光落枕前

張謨

補

謨建安人景祐元年進士又成都人紹興中進士與向綜不同時

句

桂嶺花光紛似雪荔江波色綠於苔

送向綜通判桂
州輿地紀勝

卓祐之

補

祐之閩縣人景祐元年進士官秀州判官自謂死當爲神及卒里人卽所居閩山祀之端平間贈侯爵

句

山色列屏分左右水聲鳴玉鑾西東

輿地紀勝

吳秘

補

秘甌甯人景祐元年進士累官侍御史知濬州改知舒州

謁孔林一首

高天之有文星辰豔窮碧厚地之有文草木秀野色

草木旣無辭星辰亦難測詎侔人之文五經爲藝極
五經主者何豈非至聖力三才久虛位待我先師宅
秘亦窮經者自謂入闔闕天地無逃數世人猶自惑
代移文不移宜在弟子職薰香達誠憇滴酒懸胷臆
瞿然見威容長林聳墳側闕里志

林嗣復

補

嗣復字延叔長樂人景祐元年進士官太常

博士

西峰院

參遍曹溪衆所欽元堂虛寂砌蟲吟定回暝目誰相

顧好鳥啣花下翠林

福州府志

湛

俞補

俞字仲謨閩縣人景祐五年進士知安丘縣治平中召以屯田郎中爲本路轉運判官志潔行廉年五十遂休致隱于宿猿洲三徵不起劉康夫爲撰山居記鄉人名所居爲旌隱坊

靈峰院

禪林瀟洒倚危巔稅駕登臨思豁然萬里碧光晴望海一堂幽響夜聽泉寒龜龍卧清涼地古洞雲歸黯

淡天好景自嗟吟不盡擬憑圖畫寄詩仙

三山志

長樂臺

荔子園林海日邊幽亭更在碧雲巔江山舊是無諸國樓殿今爲極樂天

輿地紀勝

吳世延

補

世延字延之一字季叟莆田人寶元元年進士官屯田員外郎知梧州與周濂溪友善著

有季叟詩文集

鼓角山

黎明騎馬出城闈鼓角山前訪古人白水一陂浮鵠

背青田千里疊虬鱗

朱詩拾遺

吳充

補

充字沖卿浦城人育弟寶元元年進士熙甯
中累遷檢校太傅樞密使代王安石爲中書
門下平章事罷爲觀文殿大學士西太一宮
使卒謚正獻

聽讀詩義感事

時修撰經義所初進二南有旨資政殿進讀

雪銷鶼鵠御溝融燕見殊恩綴上公畫日乍驚三接
籠正風獲聽二南終解頤共仰天顏喜牆面才容聖
域通午漏漸長知禹惜侍臣何術補堯聰

王荊文公詩自注

史院席上作

蘭臺開史局玉屏賜君餘賓友求三事規摹本八書
汗青裁倣此衰白盍歸歟詔許從容會何妨醉上車

揮塵後錄云神宗朝修仁英兩朝國史開局日詔史院賜筵時吳沖卿爲首相提舉二府及修史官就席上成詩沖卿唱首

送張君宰吳江

全吳風景好之子去弦歌夜犬驚胥少秋鱸餉客多
縣樓疑海蜃衙鼓答江鼈遙想晨鳴下長橋正綠波

明道雜志

題招提院靜照堂

人說招提好師從靜照來親攜玉堂句徐叩華門開
好事能如此題詩豈易哉明年得東守繫舸一襄回
至元嘉

禾志

遙贈錢公輔

使君新自四明歸邀我同爲衆樂詩山川可愛惜未
見晝想夕思心爲罷恍然神遇若有得齋身乃在天
之涯漲海連空四無岸天吳卻坐鮫人觀以手揮弄
日月丹能令桑田變瀰漫海邊偶到山城中山城二
月多春風牛羊閑暇夕陽晚樓閣參差朝霧濃一泓
山溜佛頭綠環以翠屏風六曲人煙擾擾事嬉遊落

花曬鳥滿汀洲中爲臺榭鬪十二上有藻井排文楸
旁人指點此何許云是四明行樂處此樂爲民非爲
身始知集賢錢使君使君風韻誰之比政事次公詩
短李醉憑熊軾勸耕疇狂取螺杯翻舞袂儂愛使君
君勿歸詔書奪去何如爲閑侍玉皇香案側銀臺深
阻無消息意迷卻悟坐空齋忽省君詩昨日來疊紙
爲君書所見不知衆樂誠然哉

延祐四
明志

薛利和

補

利和字天益興化人寶元元年進士厯知春

潮惠三州遷屯田員外郎

謝王介甫

一路生靈陡頓貧廟堂康濟豈無人君侯若問茶租
日請把茶租乞與人

蒲陽文獻云熙甯三年王安石議權茶欲擢利和提舉廣東茶事利和作詩謝之云云遂就常調通判廣州茶法卒不行

蘇 紘

補

緘字宣甫晉江人紳從弟寶元元年進士知
峩州儂寇至嬰城以守城陷自焚死贈奉國
軍節度使謚忠勇

英德碧落洞

此洞誰開鑿難窮造化原地幽疑窟室巖透若天闔
蘚石高低路樵聲裏外村雲嵐青欲滴煙壁翠堪捫
一帶溪泉急千枝石乳繁鼠飛猶自晝虎嘯近黃昏
老木吟風韵枯崖滲雨痕碧瀾秋寸寸甯負羽皇言

清源文獻

崔黃臣

補

黃臣字仲牧惠安人寶元元年進士慶歷八年臨海令惠和而敏見赤城志

和陳述古仙居巖老堂詩

床頭數卷書足以樂樵漁衆謂衣冠傳自同巖谷居

潛心富仁智育德審盈虛刺史如相訪淵明有舊廬

天台
別編

閩詩錄丙集卷二

朱

三

閩詩錄丙集卷二終

閩詩錄丙集卷三

侯官鄭杰原輯

候官陳衍補訂

徐復

復字復之一字希顏莆田人寅曾孫慶歷初
以布衣召見除大理評事固辭賜號冲晦處
士

蘭陔詩話云處士精音律兼通陰陽天文地理遁甲占射諸家之說與林和靖爲忘年交
往來唱和冲晦居萬松嶺和靖居孤山夾湖
相望人稱爲西湖二處士其詩亦畧相似

同林逋宿中峰次韻

盥櫛從朝嬾論交慰昔賢寒花隱亂草老木插飛煙
聽雨夜牀冷彈琴秋葉前臨高問往事厯厯是何年

鄭 蒹

蒨字春卿莆田人慶厯二年三禮科出身官
虞部郎中出知漳州

湘江秋夕

嶽麓長雲合湘江暮靄收鴻鳴沙渚夜葉脫洞庭秋
霜竹千叢密風絃一曲愁獨醒人不見兩岸水悠悠

睡覺

玉爐香斷瑞煙微小院陰岑夾幕垂一枕清風人寂

後半窗明月酒醒時
漆園蝴蝶難成夢
巫峽行雲想有期
欲曬妻涼精氣爽
漏殘燈燼畫屏欹

陳 裏

補

襄字述古侯官人慶厯二年進士厯官知制誥直學士院知陳州徙杭州以樞密直學士知通進銀臺司兼侍讀判尚書都省有古靈集

送關都官致仕

鴻雁于飛送關公也公能以禮致仕惜其有老成德不衰不養于朝天子不用古禮留之故作是詩

也

鴻雁于飛歸戾于澤君子于田亦適維則旅力不愆
曷云其極庶民之耋職自爲愚君子之耋其德有濡
旅力不愆曷云其劬有堅松柏君子斧之有實秬稷
農夫有之天子有老曷其與歸野有白駒來食我雘
君子之往胡爲不留我心悠悠爲天子之憂

幽齋

幽境絕塵蹤莓苔上粉墉秋聲連夜雨寒色一溪松
學有書千卷散無酒萬鍾雲屏孤夢斷寂寞掩巫峯
和子瞻沿牒京口憶西湖出遊見寄

春陰漠漠燕飛飛
可惜春風與子違
半嶺煙霞紅旆入
滿湖風月畫船歸
綠笙一闋人何在
遼鶴重來事已非
猶憶去年離別處
鳥啼花落客霑衣

寄遠

飛鵠翩翩暮欲棲
楚天新月射璇題
袖中已滅三年字
心曲惟通一點犀
步障影迷金谷路
桃花香隔武陵溪
瑤華好折無人寄
腸斷江樓百尺梯

夜意

熏爐香燼蕙煙沈
凜冽寒生翡翠衾
月國音塵千里絕
仙山樓閣五雲深
離懷暗耿耿金壺漏
獨夢多驚玉

女韃騎省中郎才調逸擬將文筆賦秋心

使還咸熙館道中作

土曠人稀使驛賒山中殊不類中華白沙有路鴛鴦泊芳草無情妯娌花甌館夜燈眼漢節石梁秋吹動胡笳歸來覽照看顏色斗覺霜毛兩鬢加

章羌山

在天台山西上有石壁字如科斗

去年曾覽章羌圖云有仙人古篆書千尺石巖無路到不知科斗是何書

中和堂木芙蓉盛開戲贈子瞻

千林寒葉正疎黃占得珍叢第一芳容易便開三百

桑此心應不畏秋霜

以上古靈先生集

陳洙

補

洙字師道建陽人慶歷二年進士厯殿中侍

御史嘉祐中上疏助司馬光論建儲且飲藥

而卒以明無所覬望奏下大計遂定仁宗聞

洙死賜錢百萬元祐初用光言官其一子

吳耿先生還北山舊居

蒼浪兩鬢斑盡意六經閒有術佐明主無官歸故山
釣臺春水碧吟榭暮雲閑見說還家後重將舊史刪

前賢小

集拾遺

遊雲際寺

在邵武

清曉捫蘿踏嶺雲寒風飛溜溼衣巾上攀霄漢無多
地直視城闈幾點塵古木半陰藏宿霧山禽相語厭
遊人明年更補闖中吏來看桃花爛漫春

瀛奎律體

靖安寺

江爲故宅

處士亡來二百年故居牢落變祇園詩名長共江山
在寃氣尙磨星斗昏臺榭幾人留好句漁樵何處問
曾孫昔時泉石生涯地日暮寒雲達寺門

建甯府志

呂夏卿

補

夏卿字縉叔晉江人慶歷二年進士薦爲編

修唐書官熙甯初遷兵部員外郎知制誥出

知潁州卒

泉州府志云初歐宋二公典領唐史十七年書始成凡預載筆者皆一時高選前後十餘

人遷徙不常唯夏卿與范鎮自發凡訖于絕

筆夏卿又纂新書紀志傳義例摘二公繁文

闕誤目爲唐書直筆新例一卷唐兵志三卷又集天下碑刻爲唐文獻考歷代氏族譜志

爲古今世系表

春陰

海棠陰淺日黃昏畫閣輕寒繡被溫春夢醒來能記

否賣花聲過忽開門

後村千家詩

陳叔度

補

叔度莆田人慶厯初號州推官累官大理評

事廣東提刑兼轉運提舉

雙皂莢行

綠葉森森迎曉日雙雙暗結秋霜實乾坤造化借風流陰靈滑稽爲誰匹一蒂雙葩心兩同風力兩綿神其功中官始奏獻奇異祥圖瑞牒揮毫鋒四海萬方只一株繚繞周牆百尺餘侍從宮娃共爭取攀援棘刺血羅襦采得溫泉奉金輦雪瑩肌膚紅玉暖合歡

當前此物生上皇都笑天機淺

陝西通志

上官凝

補

凝字成叔邵武人慶歷二年進士調銅陵尉

熙甯三年遷職方員外郎通判處州卒

邵武

江上臘梅村人家半掩門夕陽連野色落葉破煙痕

輿地紀勝

徐九思

補

九思字公謹崇安人慶歷二年登第調蘄水
尉趙抃唐介薦於朝入判三司後以中散大
夫致仕著有新豐集

送唐介謫英州

投荒萬里嶺南行莫叩天闔訴不平忠讐若教無竄逐奸邪何計窮安榮一封疏在銘周鼎三黜名高重漢京最是中霄雷激烈爲君特地發冤聲

崇安縣志

劉彝

補

彝字執中福州人從胡瑗學中慶厯六年進士熙甯二年召對除兩浙運判移知處州加直史館知桂林除名編隸涪州召還卒有居

陽集

夜宿善權寺追懷陳述古

精識世所稀及道古稀有伊人雖云亡遺德不可朽

嘗厭石渠游是邦爰出守浚河納湖波股派活畝畝
學宮起城隅塗人或薪槱旣富而教之薄俗適忠厚
矧予平生時昏弱賴磨操共擷姬孔微肯出皇天後
醇源浩罔涯實行靡容苟猶其老嚴阿寂寘待同叩
天乎奪大成旅茲宜興阜我來蘿荆榛雨淚滴杯酒
慟哭起秋風落葉紛林藪永懷三益恩語報乏瓊玖
願子生人間世世爲親友

周必大歸
廬陵日記

悼賢詩

良田十頃接晴煙曾假過侯救旱年俸麥一車開德
濟流民千里荷生全人嗟逝水今亡已俗感遺風尙

泣然獨對老僧談舊事斜陽春色漫盈川

嶼縣志云前剡令過昱字彥勇皇祐三年以中書郎來知剡事連值歲祲出常平錢糴米以活流民復割俸麥七十斛爲種假超化院十餘頃役餓民耕種之明年得麥五百餘斛民賴以活熙甯中昱已亡葬過故院與僧追誦歎歎見民有談及公者往往泣下因作此詩題之院壁

楊備補

備字修之建平人億之弟慶歷中爲尚書虞

部員外郎有姑蘇百題金陵覽古詩

宋詩紀事云按景定建康志載作金陵詩者楊備字修之張敦頤六朝事蹟作楊修今據文獻通考當與中吳紀聞所載姑蘇百題俱屬楊備六朝事蹟作楊修者筆誤也

夢中作

月俸蚨錢數甚微不知從宦幾時歸東吳一片煙波
在欲問何人買釣磯

中吳紀聞云楊郎中天聖中爲長溪令夢中作詩云云及寤心潛異之明道初宰華亭俄丁內艱遂家于吳中樂其風土之美安而弗遷因悟夢中所作幾于前定嘗效白體作我愛姑蘇好十章又作姑蘇百題詩每題箋釋其事

蠡口

霸越勳名閒世才五湖煙浪一帆開猶防烏喙傷同輩此地復招文種來

華山精舍

巖屏晚樹噪寒鴉
嵐翠樓臺釋子家
池面鑑光功德水
金波影裏石蓮花

泛太湖

漁舠載酒日相隨
一笛蘆花深處吹
湖面風收雲影散
水天反照碧琉璃

姑蘇臺

山花野草一荒丘
雲裏驕奢舊蹟留
珠翠管弦人不見
上頭麋鹿至今游

響屢廊

步步香翻羅襪塵
粉紅花豔滿宮春
傾城一笑無遺

迹不見長廊響屨人

洗馬池

在蘇州郡學甫

一一牽來種是龍臨波深下更嘶風金鞍玉勒拋何處騰踏渥洼寒影中

以上吳郡志

新亭

滿目江山異洛陽北人懷土淚千行不知亡國中書令歸老新亭是故鄉

晉新宮

玉案金爐對御牀歸然應似魯靈光螭頭直下雙魚尾不讓西京舊柏梁

蠶堂

摘繭抽絲女在機
夢簷葦箔舊堂扉
年年桑柘如雲綠
翻織誰家錦地衣

臺城

六朝遺蹟好山川
宮闕灰寒草樹煙
江令白頭歸故國
多情合賦黍離篇

層城觀

亦名穿針樓

秋星如彈月如梳
宮妓香添乞巧爐
萬縷千針同一意
眼穿腸斷得知無

秦淮

一氣東南王斗半祖龍潛爲子孫憂金陵地脈何曾
斷不覺真人已姓劉

獨足臺

鳥迹分明在帝臺管弦聲裏戰書來回頭一覺風流
夢猶得朱門傍水開

胭脂井

擒虎戈矛滿六宮春花無樹不秋風蒼黃益見多情

處同穴甘心赴井中

以上六朝事蹟

葉棐恭補

棐恭延平人慶歷六年進士皇祐中長興令

累官檢校都官員外郎元祐中知嚴州

過子陵釣臺

勢利輕捐寄傲中毅然高節凜秋風耕閑釣寂千年
迹立懦廉貪萬世功須信林間無怨鶴更知天外有
冥鴻扁舟夜泊靈祠下慨慕先生道不窮嚴陵

黃非熊

補

非熊永福人慶厯閒讀書三島得方廣巖之
勝作十咏傳于世自號南溪處士

玉泉洞

百尺寒泉漱玉鳴洞門斜入石廊橫煙霞不改古今

色山水無間朝暮聲窺洞野猿懸樹立驚人呦鹿上
巖行有時寫盡琴中趣風定千林月正明

福州府志

陳闡

補

闡字伯通仙遊人皇祐元年進士知萊州

題梅仙山

先生更隱寄南昌千里來尋物外鄉汲水尙憐春井
渫藏丹猶發夜壇光鶴歸華表人何在犬吠雲深日
自長我擬重來訪遺迹手揩筇杖少徜徉

梅仙事實

黃嘿

補

嘿建安人皇祐元年進士元豐中殿中丞知

衛州黎陽縣

送程給事知越州

會稽山水古來雄
內史新除捧詔東
何藉扁舟追范蠡
更將一釣問任公
久諳偃息藩垣樂
未試調和鼎鼐功
日食萬錢惟慘惜
不知蓬島屬詩翁

會稽掇英續集

連希元

補

希元字才父建安人皇祐元年進士元祐中

朝奉郎知循州

留題碧落洞

神仙誰道杳難窮
老子相傳住此宮
山裂舊分三島

洞羽飛曾馭九天風玉爲雙闕無塵到雲作丹梯有
路通誰問稚川何處在儼然金寵列壺中

吳申補

申字景山甌甯人皇祐元年進士累官殿中
侍御史知諫院出知舒州卒

題招提院靜照堂

高簷飛遠發輝光向此心源默坐忘豈憶布金拋舊
地便隨飛錫起新堂竹間野鵠聽齋鼓湖上游人繫
夜航卻惱未能攀勝境東南雲下欲騰翔嘉禾
志

林倪補

倪莆田人皇祐元年進士元豐中知惠州又知連州

遊羅浮

此日鷲城第一山我來登覽足清歡心灰久不作春
夢食淡何須輒晚餐寶積山中多佛刹藥槽峯外是
仙壇憑誰爲扣葛翁訣乞與當年九轉丹

羅浮山志

翁邁

補

邁字和沖崇安人皇祐三年鄉舉

鹿鳴宴贈歌妓

年方十三四嬌羞嬾舉頭舞餘駒皎皎歌罷鹿呦呦

近座香先噴持杯玉更柔高唐人去遠誰與話風流

全閩詩話云

邁年十二爲郡舉首邑侯歐陽

疎試而奇之郡守元暕以其稚齡不甚加禮且扣所讀何書邁日近講相鼠之詩暕異其言尚意其詞采未逮及宴鹿鳴乃遣小妓索

詩邁云云守大稱賞

黃中庸

中庸字長行莆田人皇祐五年進士授太常
博士以司馬溫公薦授浙西提刑

蓮花池

蓮花瓣裏可撐船一月喚成水一川人把水心和月

淨蓮花貯月水傾鉛

案見仙遊縣志

方子容

子容字南圭莆田人皇祐五年進士官朝請大夫知惠州

偕循守周彥質過蘇東坡白鶴新居和東坡韻
豹隱南山鶴在陰浮羅一望白雲深巧工且縮居旁
手烈士誰知負壯心嗟我抗塵仍走路羨君叩寂且
求音如何東嶺神仙境肯約衰翁數訪臨

再訪東坡用前韻

東嶺新成桃李陰春光日日向人深遙瞻廣廈驚凡
目自是中台巧運心輪奐欲形張老頌調歌先聽伯

牙音料公不負南堂約應許衰翁領客臨

鄭叔明

叔明字未詳莆田人伯玉子皇祐五年進士
官將樂令

建溪

水色山光表裏清野花溪柳意相迎狂歌驚鶩灘頭
散欹枕看雲嶺上生峰曲轉帆疑路盡潭深飛棹覺
舟輕歸程漸喜鄉關近竹戶楓林雞犬聲

吳處厚

補

處厚字伯固邵武人皇祐五年進士蔡確嘗

從處厚學賦及作相處厚通牋乞憐無汲引
意用王珪薦除館職出知漢陽軍上蔡確車
蓋亭詩擢知衛州卒紹聖中以元祐黨追貶

歙州別駕有青箱雜記

萍洲可談吳處厚知漢陽軍每謂鸚鵡洲酒
鄧佳處欲賦詩未就一日綱吏來告覆舟吳
問所在吏曰鷓鴣堰吳拊案連唱大奇徐日
吾經年爲鸚鵡洲尋一對不得天俾汝也因

得未滅

九江琵琶亭

夜泊潯陽宿酒樓琵琶亭畔荻花秋雲沈鳥沒事已
往月白風清江自流

送客西陵

若邪溪畔醉秋風，獵獵船旗照水紅。
後夜錢塘酒樓上，夢魂應遶浙江東。

青箱雜記云：王安國作詩多使酒樓嘗語余曰：楊文公詩有江南一酒樓，堤柳拂人頭。李白題詩：徧酒樓錢昭度詩亦有酒樓長憶錢唐在。上望酒樓人散，兩千絲子詩有幾。酒樓余答曰：吾詩有二酒樓，安國曰足矣。

題王正叔灑景亭

亂鶯暖處柳飛花，拍拍春流漲曉沙。
正是江南梅子熟，年年離恨寄天涯。

宣和畫譜云：王穀字正叔，居偃城之南，有小亭下臨澑水，榜曰灑景亭，南通淮蔡，北望鎮

潁川原明秀甚類江鄉景物吳處厚詩云云

自諸暨抵剡

夷猶雙槳去莫不辨東西夕照偏依樹秋光半落溪
風高一雁過雲薄四天低莽蕩孤舟卸水村楊柳堤
出得雲門路風悽日夕曛船撐鏡湖水路指沃洲雲
山色周遭見溪流屈曲分一觴復一詠誰是右將軍

剡錄

陳 傅

補

傅字竹溪建安人皇祐五年進士

望江亭

山藹峩江岸深望餘亭影落江心無風萬里磨平
玉有月千波漾碎金思遠解邀無已旬流清宣寫不
齊琴仙槎一棹驚秋曉此去銀河尙幾尋三山志

章望之

補

望之字表民浦城人得象之姪以蔭爲校書
郎監杭州茶庫移病去歐陽修韓絳等薦之
除知烏程縣固辭以光祿寺丞致仕有集

夏晝

一日常百刻轉若車輪忙千日十萬刻百年能幾長
達人齊古今一生甚微茫夏日豈爲永而足以較量

人世不足惜行善乃自彰無及閑暇時般樂爲淫荒
夷齊餓人者顏閔非公王其人品孰亞周氏與虞唐
亦用仁義積豈今身未亡富貴無可恃莫與公道強
夜思晝以力四序皆流光示君夏晝誦惕惕其自傷

宋文
鑑

張伯玉

補

伯玉字公達建安人第進士嘗爲蘇州郡從
事范文正公舉以應賢良方正能直言極諫
科嘉祐中爲御史出知太平府後選司封郎

中有蓬萊集

鐵圍山叢談云張端公伯玉仁廟朝人名重當時號張百杯又曰張百篇言一飲酒百杯一掃詩百篇故也

明月泉

至今千丈松猶伴數巖雪不見纖塵飛寒泉湛明月

墨客揮犀云張端公過姑孰見李太白十詠數美久之周流泉石間後見一水清澈詢地人曰此名明月泉公曰大白不題此泉將留以待我也

遙題錢公輔衆樂亭

句章太守錢君倚湖上新爲衆樂亭花木豈徒遊子
愛笙歌長與郡人聽坐來高韻天風起飲罷餘香夕
雨零安得凭闌縱吟筆玉觴遙對數峯青

延祐四明志

祖世英

補

世英字穎仲浦城人第進士通判融州

三學院

在新城縣郭文舉捨宅爲寺

洞庭之山天下奇岡巒百轉盤青螭金堂玉室白雲
鎖中有仙客來棲遲方晴秀骨郭文舉孤劍青鞍出
巖戶揭來此地訪禪翁共掃松花談太古擎雲忽駕
升天行西歸隻履埋巖坰聲流影散遽如許故山惟
有松風清道師懷古興不淺堂宇橫陳迎翠巘悠悠
遐想山阿人水帶雲衣猶在眼涼颸五月吹浮埃蕉
旗竹簷搖空階我來箕踞發長嘯月光飛射雲樓闌

寸心浩蕩逸天外欲去復住聊徘徊永懷西山五色

藥服之羽化登蓬萊

杭州府志

鄭少連

少連字儀魯仙遊人良士曾孫嘉祐二年特

奏名進士授劍浦主簿官至大理寺丞

寄茅處士知至

案見仙游縣志

世爭趨捷徑君獨揜柴關名利紅塵老詩書白日閒
性恬神氣逸琴淡古風還誰識冥冥意軒裳咳唾間

黃履

補

履字安中邵武人嘉祐二年進士累除知制

居言金石錄卷三
一
詰哲宗朝厯翰林學士御史中丞拜尚書右
丞入元祐黨籍孫伯思字長睿著東觀餘論
史院席上次首相吳公元韻

禮放三事宴史發兩朝餘偶綴金闈彥來紬石室書
法良司馬不辭指子游歟盛事逢衰嬾重須讀五車

見揮盧
後錄

呂惠卿

補

惠卿字吉甫晉江人瓊子嘉祐二年進士爲
真州推官熙甯初王安石薦于神宗累官翰
林學士參知政事元祐初除建甯軍節度副

使建州安置崇甯中安置宣州再移廬州死

有東平集

復齋漫錄云子美詩笠澤鱸肥人鮆玉洞庭
橘熟客分金呂吉甫詩魚出清波庖增玉菊
含寒露酒浮金呂勝于蘇蓋人客兩字雖無
亦可

答逢原

晨出趨長司跪坐與之言偶然脫韁齡相送顏色溫
歸舍未休鞍簿書隨滿門相仍賓客過敲午僅朝餐
平生性嬾惰應接非吾真况乃重戕賊良氣能幾存
就夜甫得息閱我几上文開卷未及讀睡思已昏昏
自知小人歸昭昭復何云每于清夜夢多見夫子魂

側耳聽高義如飲黃金樽覺來不得往欲飛無羽翰
昨日得子詩我心子先論怪我書若遲友道宜所敦
豈不旦夕思實苦案牘繁豈無同官賢未免走與奔
相見鞅掌閒有言無暇陳嗟嗟茲世上無食同所患
念我力難任聞子謀更艱久知爲之天安能怨寢貧
吾聞君子仕行義而已焉亦將達吾義肯遂爲利牽
東海有滄溟西極有崑崙古來到者誰不過數子尊
子已具車船吾亦爲櫟輪欲一從子遊不知何時然

王令廣
陵集附

戲題風乞兒扇

無人肯作原注
音佐除非乞沒藥堪醫最是風求乞害風
都占斷算來世上少如公

賓退錄云趙鑑堂朝野遺事云呂吉甫在趙
韓王南園京師召人風乞兒者持大扇造呂
求詩呂卽書扇上云

留題興安王廟

翦葉疎封意歸禾協濟心遺風固唐遠積德本周深
逝水悲興廢浮雲閱古今祠宮尚翬翼鳴玉漱松陰

晉祠

石刻

王回

補

同字深父侯官人嘉祐二年進士補亳州衛

真縣主簿自免去治平初以薦知南頓縣命
下而卒

浙江有感

候潮門外浙江西曾憶浮舟自此歸萬古波濤今日
是一身蹤迹昔人非愁侵壯齒頭先白淚入秋江眼
易暎日暮彷徨不能去連隄疎柳更依依

咸淳臨安志

黃通

補

通字介夫邵武人嘉祐二年進士除大理寺

丞

元夕

春樓十二玉梯橫紫府千門夜不扃疑是嬌娥弄春

色彩雲移下一天星

邵武府志

林旦

虎邱志作雄補

旦字子明福清人嘉祐二年進士累官監察御史終朝議郎直祕閣河東運使宋史附林

希傳

宋詩紀事補遺云案處爲旦之子見宋史林希傳不言初名雄題云示子處則爲處父無疑希宋史字子中或又作次中且字子明宋詩紀事作旦字次中亦誤

虎邱示子處昔與次中游題榜尚存

一望家山上虎邱淒然魄動念同遊林巒不改如平

日蒲柳先衰又幾秋敢學登臨小東魯卻因零落恨
西州鶴原寂寞歸鴻斷未拂前題已淚流

虎邱志

章 惇

補

惇字子厚浦城人嘉祐四年進士元豐中厯
門下侍郎哲宗卽位遷知樞密院事左僕射
兼門下侍郎遷特進封申國公徽宗朝責潭
州安置再貶雷州司戶參軍徙湖州居住

揮麈餘話云章惇父俞鄭公族子早歲無行
妻之母楊氏早寡俞與之通已而生子以一
合置水緘置其內持以還俞俞得之云此兒
五行甚佳將大吾門旣長登第卽惇也東坡
先生送其出守湖州詩云方丈仙人出
高情猶愛水雲鄉惇以爲譏已怨之紹聖中

爲相坡渡海蓋修祀也

遊虎丘次韻

閨閣城外小層巒瘦竹寒松數里閒並岸逢僧知近
寺入門鑿石漸登山純鉤劍化空池在幽獨詩成白
日閑遊客幸無官事束何須齋肪斂昏還

和蒲宗孟遊虎丘山書錢唐舊遊

傳聞城角艤行舟自擁笙歌選勝遊偶爲寒江阻潮
汐再容清賞囑林丘燕回吳苑風和雪夢斷錢唐月
滿樓盡把蘇杭好煙景醉吟將去詫東州以上吳郡志

梅山歌

開梅山開梅山梅山萬仞摩星蹕
拥蘿鳥道十步九曲折時有僵木橫崖
巔肩摩直下視南岳迴首蜀道猶平川
人家迤邐見板屋火耕甃確多畬田穿堂之
鼓堂壁懸兩頭擊鼓歌聲傳長藤酌酒跪而飲何物
爽口鹽爲先白巾裏髻衣錯結野花山果青垂肩如
今丁口漸繁息世界雖異如桃源熙甯天子聖慮遠
命將傳檄令開邊給牛貸種使開墾植桑種稻輸繕
錢不持寸刃得地一千里王道蕩蕩堯爲天大開庠
序明禮教撫柔新俗威無專小臣作詩備雅樂梅山
之崖詩可鏤此詩可勒不可泯頌聲千古長潺潺

湖廣總志云長沙國漢高帝始王吳芮將
梅鋗時以益陽梅林爲家號梅山後蠻王扶
氏據之至宋熙甯六年章惇平五寨分其地
爲二始以下梅山地安化縣屬武安軍惇有
梅山歌云云

蔡確

補

確字持正晉江人嘉祐四年進士厯知制誥
御史中丞參知政事元豐五年拜尚書右僕
射兼中書侍郎哲宗立轉左僕射元祐中罷
知陳州奪職徙安州又徙鄧州坐譏訕責英
州別駕新州安置

楊花

楊花三月暮撩亂送春歸盡日閑相逐無風亦自飛

輕輕攔乳燕故故撲征衣莫上高樓望徘徊滿落暉

合璧事

類別集

悼侍兒

鶼鶼言猶在琵琶事已非傷心瘴江水同渡不同歸

侯鯖錄云持正謫新州侍兒從焉名琵琶常

養一鸚鵡

甚慧丞相呼琵琶卽叩一響板鸚

鵡傳言呼之琵琶逝後誤扣響板

鸚鵡猶傳

言丞相大慟感疾不起嘗爲詩云

夏日登車蓋亭

公事無多客亦稀朱衣小吏不須隨溪潭直上虛亭

裏卧展柴桑處士詩

一川佳景疎簾外四面涼風曲檻頭綠野平流來往
棹青天白雨起靈湫

紙屏石枕竹方牀手倦拋書午夢長睡覺莞然成獨
笑數聲漁笛在滄浪

茗溪漁隱叢話云蔡確守安州夏登車蓋亭作十絕句爲吳處厚箋注得罪調新州其一絕云云殊有閑適自在之意

靜中自足勝炎蒸入眼兼無俗物憎何處機心驚白
鳥誰人怒劍逐青蠅

西山髡鬚見松筠日日來看色轉新聞說桃花巖石
畔讀書曾有謫仙人

風搖熟果時聞落雨滴餘花亦自香葉底出巢黃口
鬧波閒逐隊小魚忙

來結芳廬向翠微自持杯酒對清暉水趨夢澤悠悠
過雲抱西山冉冉飛

矯矯名臣郝鮑山忠言直節上元閒古人不見清風
在歎息思公俯碧灣

溪中曾有弋船士溪上今無佩犧人病守翛然唯坐
嘯白鷗紅鶴伴閑身

喧逐六月浩無津行見沙洲東兩濱如帶溪流何足
道沈沈滄海會揚塵

堯山堂外紀云蔡確以弟碩贓敗謫守安州
夏日登車蓋亭作十絕時吳處厚知漢陽軍
箋注以聞其略云五篇涉譏諷何處機心驚
白鳥誰人怒劍逐青蠅以譏諷譖之人葉底
出巢黃口鬧波間逐隊小魚忙譏新進用事
之人睡起莞然成獨笑方今朝廷清明不知
確笑何事矯矯名臣郝翬山忠言直節上元
閒按郝處俊封翬山公唐高宗欲遜位天后
處俊上疏諫此事正在上元三年今皇太后
垂簾遵用章獻明肅故事確指武后以比太
后沈沈滄海會揚塵謂人壽幾何尤非佳語
宣仁盛怒令唯分晰終不自明遂貶新州

王伯虎

補

伯虎字炳之福清人嘉祐四年進士官至刑
部員外郎

送程給事知越州

會稽歸去雨朱輪青瑣恩輝笑買臣簫鼓放船纔汎
岸壺漿迎馬卽鄉民夜撩詩膽邪溪月晝撥茶蹲禹
井春器業此聞裴垍薦莫將清興爲吳草

長雲千里海邊城雨粵今傳惠愛聲帝載待咨唐岳
牧郡符還屈漢公卿天墀面拜恩綸重江國人瞻畫
繡榮府掾塵埃歸未得鄉心先已逐雙旌

會稽掇英續集

莊公岳

補

公岳惠安人嘉祐四年進士官至成都提刑

吏部右侍郎元祐初上疏極諫時事璽書褒

答見樂識集

此君堂

使君新構此君堂手植玲瓏玉萬行洗濯清風消暑
晝敲摩直節任寒霜蕭森一逕長年碧灑落高軒四
座涼金筈高飛賓就醉夜深留待月華光

朱詩拾遺

陳烈

補

烈字季慈侯官人少以鄉薦詣闕不第與陳
襄周希孟鄭穆稱海濱四先生嘉祐中以薦
除國子直講元祐中詔爲本州教授卒

題福唐津亭

溪山龍虎蟠溪水鼓角喧中有鄉夢破六月夜衾寒

聞詩錄丙集卷三

宋

三

風雨生殘樹蛟螭喜怒瀾殷勤祝舟子移櫂過前灘

皇朝類苑云陳烈嘗與蔡君謨同硯席君謨
出鎮福唐東吏治民毫髮不容一日烈往見
之雜舟亭下聞其嚴察不往謁但留詩云云
使不敢隱錄詩呈公自是少霽威棱

題燈

富家一椀燈太倉一粒粟貧家一椀燈父子相聚哭
風流太守知不知唯恨笙歌無妙曲

淳熙三山志云元豐中劉待制瑾爲守元夕
不問貧富每戶科燈十盞陳先生以詩題鼓
門大燈籠云云瑾聞而謝之

蔡準

準仙遊人京之父官郎中

來賢巖

在大滌洞秀峯之前東坡倅杭同準等七人來游賦詩故號來賢

大滌洞沈沈天柱峯業業人世悲落花巖松無易葉
朝夕樵風生雲鶴閑情慙何當采玉芝仙蹤從此躡

洞霄

詩集

章友直

補

友直字伯益得象族子嘉祐中與楊南仲篆
石經於太學除將作主簿不就

書史會要云章氏煎友直之女工篆書傳其
家學友直執筆自高壁直落至地如引繩而
前亦能如其父以篆筆畫棋盤筆筆勻正縱
橫如一

和祖擇之咏震山巖彭徵君釣臺

唐宜春彭構
雲隱處

巖因更號震山居臺上猶存舊釣磯一派滄浪真隱處澄清尙可濯塵衣

祖龍學集附

李古

補

古福建人嘉祐中進士

涼軒

古國遮雷首幽軒擁縣堂何須犀避暑不待草迎涼瀟洒松筠地清虛水石鄉牛刀無所用高枕傲羲皇

山西通志

黃伸

補

伸字彥發邵武人嘉祐六年進士知河南縣

擢知泉州官至太僕司農卿與兄僅弟脩齊
名時比之河東三鳳

黃鶴樓

乘鶴仙人去不回空名黃鶴舊樓臺陽冰健筆龍蛇
勢崔灝清篇錦繡才輿地紀勝

陳 眇

補

睦字和叔一字子雍莆田人徙家蘇州嘉祐
六年進士官至寶文閣待制知廣州移知潭

州卒

題東老庵

憶昔曾來訪隱淪瀟然雲水隔凡塵畫船祇載溪中
月白酒長添座上春晝掩山扉無俗客夜吟石鼎有
高人飄飄洒落青衫子共話平生淚滿巾

東林山志

蔡 琅

補

瑗字希遠龍溪人嘉祐六年進士官至朝請
大夫歷典五郡徽宗時除江淮荆浙福建廣
南等路提點坑冶

雉山院

白雉聞經向此山轉身來伴老僧閒大都見善能開
悟天上人間任往還

廣西通志

許將

將字冲元閩縣人嘉祐八年進士第一官至
尚書左丞中書侍郎加觀文殿學士

竹窗雜錄云

許將詩有幽致同時與蘇長公

倡和甚多

散佚無存

閩中錄云自神宗以及徽宗邪正並立于朝
冲元能諫止發家及誅戮大臣可謂能匡救
時弊矣卒贈開府儀同三司謚文定

成都運司西園亭詩和章質夫十首

錄二

重樓起城陰乘高望四極列峰橫青天飛雪千里積
疑是空素山冬夏海中白莫怪頻東向上有思歸客

雲峯樓

飛閣出方池修曲見空莽低臨花塢近平覺春波長

返景澄餘暉夕陰帶浮爽從容觀魚樂不減遊濠上

水閣

成

都文類

補

陳

軒

補

軒字元輿建陽人嘉祐八年進士元祐中爲

申書舍人至龍圖閣學士

題志添禪師

車輪馬足走塵煙競看成都萬炬然獨我踏開亭下

雪伴師同坐一菴禪

補續高僧傳

汎青溪

曉煙如練曳平津一櫂東風兩岸春島鷺沙鷗休戀

我北堂歸有白頭親

嚴州府志

題蓬萊觀

白鵝乘去人何在青鳥飛來信已遙若使何郎有仙骨也須同引鳳凰簫

汀州府志云甯化劉氏女生不茹葷美而慧以不嫁自誓父母許石城何氏子卜吉聚族往送南越境白鵠從天下乘之飛去衆共勸祠郡以狀聞賜爲蓬萊觀守陳軒題詩觀中

練定補

定字公權浦城人嘉祐八年進士崇甯間提刑廣西終朝散大夫與晁補之朱長文唱和

甚多

送程給事知越州

鑑湖蓬閣南州冠詔輶眞仙去總臨江上兒童爭跨
竹日邊鴛鷺惜分襟氣凌沙漠冰霜凜旌拂蘭亭雨
露深綵筆欲窮千里景錦囊先屈滿朝吟五雲鶴馭
聊棲息萬里鵬圖在尺尋玉殿丁甯天語密未應閑
得子牟心會稽掇英續集

李詳

補

詳光澤人嘉祐八年進士

熙春臺

地回仙島風光碧人在春臺笑語溫事簡民淳知帝
力時和歲稔荷天恩

簾珠虛明十二欄翛然身世尙人間怪來拾得無塵
句放出雲屏幾疊山以上輿地紀勝

蕭竑補

竑字立之尤溪人嘉祐八年進士熙甯中長
樂縣令

福建通志云縣有桃阮溉田種千石爲高建
侵占竑簿而圖之立經界培堤岸爲斗門三
溉田二十九頃

望江亭

滄波水上巔崔嵬中有幽亭向水開草色直連天色
遠風聲長送浪聲來雲收山腳雞園見潮滿航頭釣
艇回咫尺市塵塵不到檻前鷗鳥自蒼梧三山志

靈峯院

怪石參差蹲虎兜亂峯重疊走龍蛇同上

崔唐臣

補

唐臣閩人

書刺末

集仙仙客問生涯買得漁舟度歲華案有黃庭尊有
酒少風波處便爲家

避暑錄話云唐臣與蘇子容呂縉叔同學相好二公登第唐臣遂罷舉久不相聞嘉祐中二公在館下一日忽見艤舟汴岸坐於船窗者唐臣也亟就見之邀與歸不可問其別後事日初倒篋中有錢百千以其半買此舟往來江湖間意所欲往則從之以其半居貨間取其贏以自給粗足卽已差愈于應舉覓官時也二公太息而去翌日自局中還唐臣有留刺乃携酒具舟往謁之則舟已不知所在矣歸視其刺末有細字小詩云云訖不復再見

閩詩錄丙集卷三終